

摛藻堂四庫全書薈要

集部

欽定四庫全書會要

集部

文獻集卷八上



詳校官助教臣謝登雋

欽定四庫全書

叢要卷一萬六千四百十四

集部

文獻集卷八上

元 黃溍 撰

墓記

八世祖墓重建石表記

宋

黃府君

諱景珪字叔寶婺之浦江人溍八世祖也府

君父諱昉字明仲母于氏墓在縣西花橋之南而府君

墓在縣北之後店夫人朱氏子一人諱琳娶宗忠簡公

澤之女弟始家于義烏是為溍之七世祖孫三人伯曰

璣仲曰益其季諱中輔則潛之六世祖也自是族日以  
大舊譜所載間有脫畧其可見者曾孫萬頃昭祖紹祖  
公顯公煥無咎少亮潛之揚祖九人諱紹祖者於潛為  
五世祖玄孫伯謹簡天壽慕韓某伯昌必大伯信夢符  
伯恭三畏伯紀桂發維介子唐英綱續十八人諱伯信  
者於潛為四世祖累贈朝散郎朝散公有子三人長諱  
夢炎朝散大夫行太常丞兼樞密院編修官兼權左曹  
郎官以朝請大夫致仕次忠翊郎權安慶府望江縣令

次太學生熒朝請公未第時嘗刻石表府君墓年世  
殊邈或竊取其石而去或據其墓垣外餘地而有之太  
學生之孫可久望江令之孫可傳等始按其籍悉復故  
地遂伐石重建此表俾潛志于下方潛朝請公之曾孫  
承節郎諱崿之孫皇贈中順大夫同僉太常禮儀院事  
江夏郡伯諱鑄之子其生也後無從備聞上世事府君  
之年壽卒葬與凡行事雖逸其傳而子孫衆多有以彰  
積善之餘慶是庸叙次世系訖于功總譜所弗具莫能

詳也袒免而下今又六世譜之所及百五十人亦不得而盡著焉至正七年春二月甲子八世孫潛謹記

先祖墓銘石表記

嗚呼是為吾祖考黃公祖妣徐夫人之墓自我先人奉柩合葬于茲十年而潛誤玷科名叨塵官使又二十有八年乃得請而致其事德薄位卑所以榮其先者寵數有限後四年欽承上旨起自退休入直翰林備員侍講始用著令得推恩二代比年兩膺錫命公初贈中順大

夫禮部侍郎上騎都尉追封江夏郡伯再贈嘉議大夫  
禮部尚書上輕車都尉追封江夏郡侯夫人亦自江夏  
郡君進封江夏郡夫人惟黃氏娶大姓由金華散處它  
郡者仕宋多致顯官而公七世祖諱昉六世祖諱景珪  
仍居婺之浦江五世祖諱琳娶忠簡公女弟又徙義烏  
而為其縣人未有出而仕者高祖諱中輔以文學行義  
知名轉運使薦于朝將授以官命垂下而卒曾祖諱紹  
祖復隱弗仕祖諱伯信廸功郎累贈朝散郎妣宗氏忠

簡四世諸孫女累封安人考諱夢炎淳祐十年進士仕至朝散大夫行太常丞兼樞密院編修官兼權左曹郎官以朝請大夫致仕妣陳氏方氏陳氏贈宜人有子曰垓方氏實生公諱堦朝請公第二子也朝請公遇明禋當任子輒推以與其姪故公兄弟無用廕入官者公僅以進納補承節郎而不及祿生於嘉熙四年六月二十四日卒於今大德八年五月二十四日享年六十有五夫人東陽徐氏曾祖諱楠祖諱忻考諱彬淳祐七年進

士嘗以奉議郎行國子正與朝請公並入淮西淮東制  
幕為主管機宜文字會改建兩淮宣閫又同辟幹辦公  
事故以夫人來歸而公以疾廢夫人安於命分育我先  
人為子以保其世業三從之義靡所缺虧生於淳祐四  
年八月一日卒於今大德七年八月二十四日享年六  
十墓在縣東北崇德鄉東埜之原與先塋相望葬以十  
年八月贈封之制下則至正七年十月八年十二月也  
一子即我先人諱鑄用朝請公遺澤補將仕郎宋亡遂

絕意仕進後五十年乃以恩受封終於從仕郎溫州路  
樂清縣尹今累贈中奉大夫江浙等處行中書省叅知  
政事護軍追封江夏郡公孫男五長即潛次溥次浩為  
朝請公長女之子劉應龜後更名鼎次淇次滋為朝請  
公長男垓之子頤後女三達賈師夔劉咸生劉拱辰曾  
孫男六擣檮梓樞杞楨女二達陳克讓劉道泰玄孫男  
八璨瓊璋瑞瑄琛塘城女三鳴呼昔歐陽文忠公作瀧  
岡阡表於卜吉六十年之後自以為非敢緩也蓋有待

也潛衰謝之餘繼罹憂患苟存視息以終天年寧復有所待乎詔使在門義不俟駕龍光赫奕有墮自天褒大顯榮貴及泉壤則文忠所謂遲速有時不克有於躬而足以表見於後世庇賴其子孫者也虔奉命書展告玄宅感慕涕泣不知所云姑序其梗槩于茲石表嗚呼來者尚有以知其所自而永永不忘哉至正十年八月一日

日孫男潛謹記

先考墓誌銘後記

二首

先君既葬且免喪潛起自草土復從薦紳之後因得乞  
誌銘書篆於同年三鉅工頤以糜身下列久未克歸入  
石既蒙恩外補以先夫人春秋高不俟引年納祿而歸  
將磬石以刻而奄罹大故惟先君荐膺崇贈祠版已屢  
改題誌銘書篆不宜尚仍其舊先夫人之葬僅序歲月  
納諸壙而未有以昭示于後人潛憂患餘生退休田里  
無繇奔走俯伏大人君子之門以請懼因循廢缺愈重  
不孝之罪謹以其文摹勒上石而以其所不書與未及

書者悉系于石陰初朝請府君之姊適從事郎昭慶軍  
節度掌書記王公因金嘉熙戊戌進士有女作配于儒  
林郎兩浙西路提舉常平茶鹽司幹辦公事丁公應復  
實生我先君年十有二朝請府君見而竒之承節府君  
以疾廢遂俾育先君為子儒林公世居吳興朝奉郎伯  
虎嘉定癸未進士於公為考中大夫直寶謨閣太府少  
卿曠慶元丙辰進士於公為祖公方以考舉及格待班  
而德祐失國公亦失世祿家日益落先君迎致侍養終

身歲時為位以祭惟謹此誌之不書者也童氏金華大姓先夫人之曾祖父迪功郎臨安府錢塘縣尉大父必遇迪功郎紹興府嵊縣主簿父承信公娶俞氏以寶祐四年六月十九日生先夫人年二十歸于先君後先君十二年卒至正三年六月二十三日也享年八十有八其年八月二十七日奉柩祔于先君之右先君受封五年卒長子溍自國子博士出為江浙等處儒學提舉始贈先君奉政大夫祕書監丞驍騎尉追封義烏縣子

先夫人進封義烏縣太君溍之婦王氏昭慶書記公曾  
孫女亦自宜人加封義烏縣君溍既得謝而廷議妙柬  
儒臣付以史事旁招疏賤俾預討論使者及門先夫人  
之殯在堂已九日矣服除乃拜祕書少監致仕之命累  
贈先君中順大夫同僉太常禮儀院事上騎都尉追封  
江夏郡伯先夫人追封江夏郡君孫男櫟已卒梓國子  
學生今用廕赴吏部銓女嫁惠州學正陳克讓者亦已  
卒次嫁劉道泰曾孫男又三璋瑞瑄女一此誌之未及

書者也然所謂考其所自出者蓋有不容盡泯所謂贈  
典日隆者固逆知其可必溍是用推述而備著之先君  
之嘉言懿行先夫人之淑德令儀雖非不肖孤所能稱  
道祖父姻亞官封卒葬之詳來者或有稽焉至正五年  
十二月十五日男溍謹記

溍立石未幾而被上旨落致仕入直翰林脩員侍講比  
歲累蒙推恩褒及於二代承節府君初贈中順大夫禮  
部尚書上輕車都尉追封江夏郡侯徐夫人初追封江

夏郡君再追封江夏郡夫人先君加贈集賢直學士亞  
中大夫輕車都尉追封江夏郡侯再加中奉大夫江浙  
等處行中書省叅知政事護軍追封江夏郡公先夫人  
兩追封皆江夏郡夫人溍之婦王氏亦兩封江夏郡夫  
人間者溍以衰朽乞身而退克親奉帝制展告以禮俄  
復拜召還之命未遑有所登載茲幸得請歸守先隴乃  
序次其略附見于石陰之下方曾孫男又三琛塘城女  
二玄孫男一道永至正十年七月七日男溍謹記

# 外舅王公墓記

外舅王公之歿遺命屬潛誌于幽堂潛方竊食輦下既蒙恩外補乞身而退俄被旨落致仕復玷朝行及得謝而歸則奉襄大事已久潛亦老而耄及之矣念他日不可無以藉手見公於地下謹追書其所可知者俾揭于墓之原公諱桂字仲芳姓王氏月谿其自號也其先汲人宋渡江初五世祖琳避地南來家于婺之東陽暨四世祖徽咸弗仕曾祖諱師伋以子貴累贈中奉大夫妣

宗氏京城留守兼開封尹贈觀文殿學士忠簡公澤四  
世諸孫女通判衢州夔之曾孫女累贈令人寶章閣學  
士劉公克莊銘其墓祖諱困金嘉熙戊戌甲科進士授  
從事郎昭慶軍節度掌書記未上而暴卒妣黃氏我高  
祖贈朝散郎諱伯信之女曾祖太常丞樞密院編修官  
左曹郎官朝請大夫致仕諱夢炎之姊朝散與中奉為  
友婿故以長女為其家婦考諱沂文林郎監沿江制置  
副使司造場妣張氏初昭慶入奉大對臚唱之日太師

魯國喬文惠公行簡為首相立殿上退遣吏賀曰當以衣鉢相傳蓋謂其居同里同以四十餘為殿試第五人也而不料其竟不及祿母弟曰鎔前十年已擢龍飛第踐駁所至內則郎曹寺監外則監司帥守終於中奉大夫直煥章閣荆湖南路計度轉運副使撫兄子如己子由是文林以恩補官公本宗氏子令人之從孫也煥章遵母命俾為文林後亦以恩補將仕郎公生長宦家自少親炙諸老痛洗綺紈子弟侈靡之習而刻意於學為

文操筆立就若不經思而藹然有前輩典雅尤工於歌  
詩樂府駢四儼六之語善楷書端勁方嚴得顏柳遺法  
南嶽有鎮南之嚴四大字乃煥章將漕時令公代作迄  
今猶存人莫知為公之筆也隨侍宦游歷七閩三湘且  
久留江上多所見聞遭時艱虞頗慨然欲以事功自奮  
際今聖代四海合一分命重臣坐鎮南服號曰行省承  
制署公處州麗水縣主簿公不敢辭受而不赴自是絕  
意於仕進徙居別室開門授徒生計日衰簞瓢自適安

常處順既壽而康重紀至元之五年某月某日不疾而卒享年八十有八有四書訓詁十卷詩文雜藁十卷隨筆一卷娶李氏寶謨閣直學士吏部尚書大同從曾孫女前公十有七年卒子男二人長武次復並為外家李氏婿武後公某卒復今獨承其家女五人長即溍妻累封江夏郡夫人溍之曾祖姑歸於昭慶王氏以女歸于溍篤世姻也次適李法尚書四世嫡孫次適何德光次適呂潮某州司法參軍友德四世孫次適何德潤孫男

二人坦墳坦亦已卒女一人凡子孫若婿若外孫男女合三十有二人先是煥章葬縣北甘泉鄉廣陵寺之後山構祠宇割田四十畝有畸俾寺守之而僧悉以田質錢於富民公銖積寸累贖而還之晨香夕燈之須賴以無闕公又以昭慶墓在縣南之東姜族子或竊其地券售於豪家有司弗能直文林墓在縣南之桐川又數毀於盜遂卜地於煥章墓東南之唐塢遷兩世四喪及內子之柩以昭穆序葬仍虛其左以為壽藏旁置家舍

名之曰繼庵示子孫使勿替其承也公既歿二子以至  
正某年某月某日奉柩即公所自為磚槨安厝焉始公  
命潛銘外姑之葬而自銘其壽藏曰生吾順兮歿吾寧  
魂氣超騰兮風露青冥佳山佳水兮佳城欝欝吁嗟兮  
吾其寓形此室銘成而不及自誌其平生本末爰以屬  
於潛惟公之盛年有官而無位晚復抗志事外故其素  
蘊不少槩見於設施潛所書若甚簡畧而皆有可徵不  
敢效世俗巧飾誣言以為欺也至於系序官伐姻亞之

詳雖細勿遺不暇一一裁以古書法而去其繁冗誠懼  
夫後之人日遠日忘也過而覽者幸無誚焉至正十三  
年冬十有二月二十七日庚申壻翰林侍講學士中奉  
大夫知制誥同修國史同知經筵事黃潛謹記

銘

勤有堂銘

皇錫下人展也良貴能者守之罔敢怠棄惟勤為常非  
有為異反身而誠萬物皆備其勤斯何歟壽以之雖休

勿休伊誠之思其有斯何匪我也私不物於物而誠之

為孰劬而躬閔勉朝夕封吝殖驕執為已得一元默運

其生職職天德之修人道之極猗君之為厥志允臧式

敬爾承勿助勿忘閑邪存誠充實輝光我曷振之勒銘

茲堂

兼善齋銘

墨貴兼愛儒者擯之詎曰此道我之得私必由其本以  
及其支相古先民孰為我師莫窮匪顏莫達匪伊何志

何學朝斯夕斯乾之善世則罔敢知坤之積善尚其孳  
孳止也以所動也以時毋慕千里忽于毫釐仁如夷吾  
或羞其卑為善有術視我銘詞

腴晦齋銘

王君仲致以腴晦名其齋蓋有取乎考亭朱子冠而字  
之祝辭云爾夫所謂人晦於身神明內腴者復而通也  
今乃援其辭而左之者通而復也仲致來徵銘為之銘  
曰

惟皇播物終始一誠屈信相推乃色乃形有出於幽以  
豐而亨有入斯息明夷之貞而通而復與時偕行展也  
王君歛其華英退藏于密以觀其生與造物者游神之  
廷曰予庶幾天之性情我曷相之式彰茲銘

息菴銘

上人允茲扁其菴曰息因以自號蓋扁以章所息之處  
號以表能息之人能所相為無窮吾未見其息也上人  
來徵銘為之銘曰

謂菴非人孰累於名謂人非菴名孰與嬰所息者境能  
息者智菴邪人邪依正不二剝韌之項能所雙七十刼  
何短一息何長勿生勞苦而止中路咄茲草菴非汝住  
處

圓硯銘

翼之家藏王使君所貽圓硯有白文貫其腹銘曰  
黑之守處也久白之不涅歸也潔

興讓堂銘

何君貞立起進士官七品法當封父母及妻父以讓於其祖妻以讓於其祖母有司如其請以聞弛恩既行乃扁所居之堂曰興讓名人鉅公樂道其事紀載而誦詠焉君出以示予因系之以銘曰

讓之為義推已所有木水本源則有所受子承其考婦繼其姑家之積慶匪我有餘嗟嗟末俗借鉏取帰孰視爾民俾歸於厚施由親始千乘可輕義以起禮善不近名皇仁在上孝子不匱奕其龍光恩榮備至爰建稱號

樹之風聲一家之讓國人其興作為銘詩薦此樂石匪私其家維以勸德

方齋銘

鄱陽胡君以方齋扁讀書之室而俾其子益來徵銘為之銘曰

輿之方輪以圓而相資鑒之方枘以圓而相違天下之方盡于五寸之矩所不能盡者物情之不齊是故君子方以正己之度圓以任物之空主至靜以為德不自毀

于腓隨匪惡圓而喜方諒所秉之莫移爾息爾藏矩範  
在茲無矜而名尚允蹈之

青石硯銘

雪窯方丈所蓄青石硯德壽故物也銘曰

匪琥其白匪璋其赤夫蒼蒼者天之正色韞匱而藏守  
之以黑毋曰茲宋之隕石也

恒德齋銘

易之為義隨時變通有不變者確乎其中是曰恒性人

之固有充為恒德不息則久聖人之道久而化成由其  
不息是之謂恒惟君法天偕行偕極惟臣承君咸有  
一德繫公之先國之元臣篤生後賢左右聖君吾儕小  
人朝不及夕夫孰如公自強不息體之既立其用必行  
措諸事業乃恒之亨先懷于茲益謹其度與國同休以  
永終譽

墓誌銘

張君妻趙氏墓誌銘

潛為諸暨州判官之明年得一士曰張復蓋喪其母踰再閏猶哀慕不已益求時之間人為詩若文以抒無窮之悲焉竊嘗取而閱之非直其母為可稱道其父之事尤有足紀者夫刑善以勸俗長民者之責也潛幸以末學與聞有政庸掇其繫乎人之大倫者為銘以畀之銘曰

於粵之墟句吳之里孰望其地曰有張氏軫君之名君實其字羣居太學五載不第文不在茲運去物改白刃

可蹈惟義所在爰有賢配克儻其美名曰與婉胄出燕  
邸五世祖謨疏封安定從伯祖光典領宗正暨惟伯父  
以文藝著兩制八座累膺異數父曰希堅進食京秩出  
宰桂平千室之邑其叔父嵩亦主外藏流芳奕葉後先  
相望展也令淑婦德是履守節自誓嫠居四紀至治初  
年龍集壬戌三月之朏翼日而卒上距始生五百甲子  
男復暨顧訖葬以禮于嗟復也終身之慕禫服既除祥  
琴弗御父也義士母也節婦不有孝子曷顯父母繄長

民者宜存風勵顧慙不敏承乏下吏瞻彼西莊丸丸松  
栢勒辭相哀用勸凡百

江浙行中書省左右司都事劉君墓誌銘

君姓劉氏諱濟字仲源河間肅寧人大父法靜父元皆  
弗仕至君始以東江場同管勾遷昌國正監管勾入御  
史臺為宣使肅政廉訪司立選授江南浙西道管勾承  
發架閣兼照磨以照磨劾其使貪縱不法事聞使坐斥  
去君亦以秩滿調婺州路司獄有余甲者以貧自鬻為

人奴勢家子慕甲妻美弗能得會其主病死金華道上  
因誣甲殺主而奪其妻吏既傳致成獄君直其冤破械  
出之蘭溪民王乙為怨家所殺乙親戚兩人將訴其事  
怨家懼更屬吏捕治兩人謂乙私其妻實共殺乙賴君  
言徙其獄旁郡兩人得不死它以事株連苦鋟鍊無得  
而久繫者君悉為剖析所活十有四人所縱遣八十餘  
人永康大姓以睚眦之怨毆人至死有司弗敢詰反抵  
告者罪君求得其情乃収案殺人者宣慰使而下以受

賊曲法敗者五十餘人用舉者復入江南諸道行御史臺為令史丁父憂服除授湖州路總管府經歷於是天子方用言者悉徙江浙行中書省郎中以下它官更取材望補其處君以選擢左右司都事且追用平反超陞承德郎到官明日而卒延祐元年七月二日也得年五十有五其孤汝珪等將奉柩歸肅寧以某年某月某日葬縣東安仁鄉長城之原泣謂溍子辱游於先人最久宜知先人盍有述溍婺人也幸能道君為獄官時事它

宜傳者詎止是耶史稱于公為郡決曹決獄平今所見  
獨孝婦不殺姑一事而太守莫能聽至令抱具獄哭而  
去然則君亦足以不朽矣謹次而為之銘君娶曹氏次  
林氏子男三人汝桂汝楫汝弼女三人長適同郡韓梓  
道餘在室孫男若干人女若干人銘曰

孰降其材而奪其施孰受之器而易其宜百疇一逢孰  
終尼之維善無小維官無卑考事列辭式昭厥垂

真定路深州知州致仕劉公墓誌銘

公姓劉氏諱守讓字謙甫其先由大父立而上世為汴人金末父信避地真定因家焉故今為冀州南宮縣人母李氏有五男子公其季也公年甫踰弱冠入祕書監為奏差尋又入御史臺為殿中司知班久之擢浙東海右道肅政廉訪司管勾承發架閣庫兼照磨時方新使名以正憲度將指者皆名卿參佐悉取材望公妙年首膺其選深自砥礪以求報稱間以慮囚攝使事行郡邑懲姦貪省寃滯接引善類所至有聲居七年乃代去調

婺州路總管府知事俄復入江南諸道行御史臺為令  
史調霍州靈石縣尹未上丁內艱服闋改慶元路平準  
行用庫提領秩滿以奉訓大夫真定路深州知州致仕  
至順二年十二月十五日以疾卒于鄞之寓舍得壽七  
十有五公長髯秀眉容止言論閑雅不迫有古君子風  
善屬文尤喜為歌詩以其自號扁所居室曰本齋琴樽  
圖史羅列左右退食則宴息其中客至與談中原文献  
之舊娓娓不倦性廉退不急於進取每詣京師輒自赴

吏部銓俛首常調殊無難色其任筦庫也分飾閭乘廉  
車者皆公故等夷見公必與均禮公執其分守滋益恭  
仕既久而家愈落歿之日賴故舊致賻襚乃克以斂其  
清約如此娶鄭氏張氏皆先卒子男五人長適管軍百  
為晉寧路石樓縣尉次貞祐某某女三人長適管軍百  
戶孫毅夫次未行次適孫某孫男三人女一人初公母  
氏卒于建鄴葬城西之清涼山元等將以某年某月某  
日奉公柩葬其左貞來俾某為之銘始公佐憲府某因

公行部以諸生禮見公未嘗以凡子遇我自是周旋公  
父子間殆四十年銘非滑其誰為之雖不文不敢辭也  
公家世之詳約齋劉公實誌之此不著銘曰

人孰不仕易失者時嘆老嗟卑百喙一辭猗與劉公蚤  
有令聞素乎其位無喜無愠澤及後人惟德之符我銘  
孔昭以勵鄙夫

福州路總管贈嘉議大夫太府卿上輕車都尉  
追封天水郡侯謚景惠趙公墓誌銘

公姓趙氏諱執中字景賢世為趙州寧晉縣人祖謙趙州都事父珣將仕郎亳州萬戶府經歷至元初太尉河南武定王為征南都元帥合蒙古漢軍擊襄陽公時年未弱冠以推擇為吏隸河南統軍司從築白河口廩門新城元帥察公材可用因寘之幕府公雖主治文書不專以鈞撫趣辦為務日與士卒同冒矢石未嘗辭難凡軍中大計亦往往由公闡說用久次陞提控案牘歷行中書樞密兩府掾太師淮安忠武王以右丞相行中書

省事復署公為屬時襄陽已下丞相總諸軍水陸並進  
公與在行從諸將轉戰而前既渡江取郢州丞相提舟  
師順流而下俾公從平章政事楚國武定公分治省事  
移書諭降荆湖諸州軍十三年春丞相至臨安以宋版  
圖來上計功行賞公自省提控令史拜中順大夫壽昌  
府知府行同知真州路總管府事久之用例解所佩金  
符句容武毅王時在樞密丞相言公於渡江有勞且嘗  
蒙上恩備官使宜因其舊職序進之武毅以聞得以

有司常法限其資級改朝列大夫同知泉州路總管府事用薦者以朝散大夫為南雄路總管除中順大夫福建等路都轉運鹽使秩滿以少中大夫為福州路總管至大二年九月某日卒於官享年七十公之在泉州也盜起安溪掠大洋川據石盤頭勢張甚守將莫知所為公單騎直抵其處群盜大驚公徐曉以禍福則相與羅拜願貸死公因撫定之後皆為良民蓋公久居兵間聲望已著故能使之讐伏如此其以省檄閱漳州金穀也

得羨錢五千緡米萬石其為轉運也患富商交場吏受  
鹽不以法命以竹器如法實鹽而倅福之南臺列倉于  
漳泉興化以貯之持引就受鹽者無所容其弊歲得羨  
鹽五千九百引其善理財又如此惜夫久在外服其政  
迹有非談者所能悉知也夫人王氏劉氏皆先公卒子  
男七人長曰鉉以公廕入仕今為承務郎婺州路東陽  
縣尹孫男七人鉉等既以四年十月某日奉公暨夫人  
之柩合葬寧晉縣村先塋之次後若干年始得請於朝

贈公嘉議大夫太府卿上輕車都尉追封天水郡侯謚景惠仍贈夫人天水郡夫人爰以書來願得銘昭揭墓道潛惟人材之生必于興運匪特將相重臣兩有文武其僚吏亦一時之選也千載之下尚論其世知有伊呂蕭曹而已其能因事附見於策書者幾何人哉然則趙公之事固不可無述也乃弗辭而銘之銘曰

嗚呼趙公受材孔良歛藏不耀出其豪芒貔貅百萬長鏃鈎戟公於其間持以文墨豈無悍強畏此簡書飈騰

電擊靡亟靡徐江流湯湯其險莫測投鞭而往歸數爾  
獲孰發而蹤其功也人公罔敢知國有元臣元臣之賢  
天子之聖曰弗汝遺視汝初命公材則多無適不宜魚  
符龍節未究厥施尚其嗣人克圖不朽馳書謁辭式告  
永久

亞中大夫漢陽知府致仕盧公墓誌銘

公諱克治字仲敬姓盧氏其先由范陽徙河陰徙滑之  
胙城曾祖諱某祖諱鉉皆不仕考諱璉嘗佐開州軍事

因家焉故又為開州人公少負志氣稍長知讀書慨然  
思自奮拔於功名至元十三年從軍取淮甸有勞入淮  
東都元帥府為令史厥明年國家底定南服論次功賞  
授承務郎漢陽府判官時郡邑新附人心匈匈凡所以  
布宣上德撫慰綏集之者公之力居多換從仕郎龍興  
路總管府經歷用察官及部使者薦擢江西行尚書中  
書兩省左右司都事以材敏見知於參知政事東平徐  
公亡何以事乘傳入奏京師遷江浙行中書省左右司

都事於是徐公方持部使者節蒞浙右亟剗上乞署公  
臺職未報而公去為兩浙都轉運鹽副使東南財計莫  
重於鹽筴先是恒以歲賦減耗為憂公規措有法自常  
箕外得羨鹽八萬九百引以最聞除知平江常熟州下  
車牒訴僉集公談笑立決吏畏服如神有以強盜坐繫  
者公探其獄以為此愚民無知因客舟漂抵旁近地而  
利其菽粟耳非有首事合謀受分之驗不可悉寘之死  
僚佐疑不決後竟如公言獲減免者三十有九人歲饑

諭大家使賑其不能自食者民用無轉徙既又以為水利未復則旱澇之患不可去乃行視許浦福山諸水之故道湮廢不治者十有六募民浚導之如其舊為水門以時其蓄泄之宜而閉縱之凡役工一百一十四萬所食米以石計者三萬四千四百鹽以斤計者一萬九千九百官無毫末之費而民得其利不以為病也田里既以無事乃大治學舍凡廟像器服之不如法者易而新之田租之冒沒者理而復歸之其所以嘉惠是州者閟

五載如一日會朝廷以沒入朱張家財物悉歸中宮擇  
可任出內之寄者或言前簿錄朱張家時公嘗被檄與  
聞其事乃命公綰銀章為江浙等處財賦都總管以泄  
焉常熟之人皆重惜其去相率為生祠且請于前史官  
聊城周君作文以記之有司其實以聞除知建康溧水  
州其治如在常熟引年以知漢陽府致仕累階亞中大  
夫公素薄於榮利既謝事居吳中一室翛然日與賓客  
以觴詠相娛樂至治三年十二月二十六日以疾卒得

壽七十有四夫人李氏與公生同歲先十二年卒以泰  
定某年某月某日合葬開之濮陽縣黃斌原子男四人  
長曰恂奉議大夫晉寧路潞州知州兼管本州諸軍興  
魯勸農事次忱蚤卒次惺次悅女三人長適福建都轉  
運鹽使司奏差劉徵餘未行孫男二人保僧閔僧孫女  
二人俱幼公為詩曰琴川集者若干卷曰錢唐集者若  
干卷並藏於家惟盧氏望范陽號稱官族其別於開有  
任參知政事追封范陽郡公謚文昭者曰克柔公之伯

兄也文昭之子景今江陰州尹昱以文章家知名終於  
翰林待制而公又有潞州以為之子方興而未艾也是  
不可無使來者知積累之自潞州以公行實來徵銘謹  
序而銘之銘曰

奕奕盧宗世有顯人繇公兄弟弗墜益振公之受材孔  
敏且裕載而四馳以往用譽胡既遇矣不究于施曰予  
其休退也委蛇勾吳之墟言游之里遺愛在人匪遠伊  
邇人孰不仕孰完於公始卒無疵而以豐終公不三事

公則有子揚詩墓門垂示無止

霽峯李先生墓誌銘

先生諱消孫字甫山姓李氏其先出唐宗室燉煌房五代時避地越之三界三界者會稽上虞嵊三邑之衝也迺益東南至台之寧海家焉曾祖父穆宋迪功郎祖父開之弗仕父演與同里葉公夢鼎俱受業宜龍圖閣鄭公霖葉公後由太學釋褐至丞相先生之父故為布衣人知其宜有後矣先生少歲即能讀父書既成人師事

太學博士舒公津學日以進方是時羈旅之士得群試  
于漕司號曰寓試就試者動以萬數歲甲子先生年二  
十有二以詞賦中其選第一聞者咸歎奇之已而上春  
官不合鄉先達右司郎官陳公緯憐其才宦游所至恒  
引以自近癸酉更以國子生預奏名遂擢甲戌進士第  
授廸功郎黃州司戶參軍未上而黃州以版圖歸職方  
先生棲遲海濱者餘二十年有終焉之志郡府或以先  
生名剡上先生為強起詣京師述大都賦以獻時大德

二年也居七何而歸六年迺得杭州路儒學教授延祐  
元年以選為江浙同考試官三年以從仕郎台州路黃  
巘州判官致仕天歷二年三月二十八日卒於家上距  
生年癸卯得壽八十有七以至順某年某月某日葬  
朱開鄉何山之原元配王氏先五十一年卒祔葬董公  
山先墓繼胡氏先十二年卒與先生合葬焉子男四人  
長梁以先生致仕恩今為某官次梁次大德蚤卒次東  
孫男十一人炳炫燧炳煊灼嗣忠嗣弘炤烜輝凡先生

為學官教人有法其較文稱賢主司至於興壞補弊出  
內之謹直其細耳故侍御史馮公翼嘗薦先生可臺職  
不報先生蓋仕而未顯同學者因其自號尊之曰霽峯  
先生云先生所著詩賦贊頌箴銘表啟碑誌序說總若干  
卷唯大都賦今行于世重修台州圖經列于官書溍  
以先生較文鄉闈之歲忝備薦送筮仕之始適在先生  
所居邑而獲以禮見先生之將葬也榦與溍遇於錢唐  
泣且言願得銘刻石冢上溍雖不敏誼不敢辭銘曰

嗚呼先生兮世孰予知山之幽幽兮食有蕨薇謂世莫  
知兮終不我遺大龜寶玉兮其陳以時裹味雖厚兮弗  
寶鼎彝鼓缶而歌兮日是之離何虧何成兮式全吾歸  
清風拱木兮百年之思樹此貞石兮昭薦刻辭

楊仲弘墓誌銘

仲弘既卒之明年潛往哭焉其友壻蔣堂代致八歲孤  
選之言曰先人之葬非先生莫宜為銘此先人治命也  
敢奉以請惟先生哀而許之潛不敢不諾也初潛與仲

弘不相識輒以書締文字交凡五年始識仲弘後十有一年乃與仲弘同舉進士又八年而仲弘死矣嗚呼其忍執筆而銘諸仲弘諱載姓楊氏其先建州浦城人上距宋翰林學士文公凡十一世曾祖有雍祖祐之皆有隱德父起潛補京學諸生因家於杭故又為杭州人仲弘少孤事母李氏盡孝而有禮年幾四十不仕田理問用之得其文薦之行中書舉茂材異等不行周御史景遠強之至京師俄以母喪去賈戶部國英數言其材能

于朝遂以布衣召入擢翰林國史院編修官與修武宗  
實錄書成褒賜甚厚居止何調管領係官海船萬戶府  
照磨兼提控案牘於是仁宗在御方以科目取天下士  
仲弘首應詔登延祐二年進士乙科用有官恩例視第  
一人授承務郎饒州路同知浮梁州事秩滿遷儒林郎  
寧國路總管府推官未上以至治三年八月十五日卒  
得年五十有三泰定某年某月某日葬杭州錢塘縣某  
鄉某原娶瞿氏子男三人長即選也次遵次迪俱幼仲

弘平居性和易然於論議臧否未嘗有所假借其游從  
皆當世偉人吳興趙公在翰林尤愛重之亟稱其所為  
文由是仲弘名益聞諸公間蓋仲弘於書無所不讀而  
其文益以氣為主毫端亹亹從橫鉅細無不如其意之  
所欲出譬如長風怒飆一瞬千里至於崎岸之縈折舷  
欹柁側亦未始有所留礙也凡所譏著未及詮次以行  
而人多傳誦之潛嘗評其文博而敏直而不肆仲弘亦  
謂潛曰子之文氣有未充也然已密矣潛每歎服其言

今已矣無與共論斯事矣嗚呼而尚忍銘諸姑述其槩以慰吾亡友於地下云爾銘曰

嗚呼仲弘而止於斯孰昌其氣之死不衰優優其辭不屈不枝有寧一宮文冢在茲過者必式考予銘詩

張弘道墓誌銘

弘道既沒於杭其子正蒙奉柩還山陰而狀其世叙官閥來求銘以葬予與弘道同對大廷同校文江西又同校文江浙未卒事而弘道移疾丐休致去臥翔鸞佛舍

竟不起悲夫尚忍銘諸雖然知弘道者莫予若也銘非  
予將誰屬弘道諱士元姓張氏弘道字也弘道生宦家  
而自其少時不習貴游子弟嬉戲事稍長從鄉先生黃  
君受毛氏詩為舉子業場屋事廢士之志于祿仕者率  
投牒求察舉補儒學官弘道恬然不以動其意左簾右  
瓢幾四十年會有詔行貢舉法有司迺起弘道使就試  
遂以延祐二年賜同進士出身歷將仕郎慶元路鄞縣  
丞從仕郎池州路貴池縣尹承事郎太平路總管府經

歷用致仕授承直郎同知鈔山州事命下弘道已卒其  
卒以天歷二年十月二十日壽六十有四葬以至順某  
年某月某日墓在承務鄉某山之原弘道為人內秀朗  
而外朴疎所學務平實其居官以樂易稱未始求赫赫  
名眩流俗嘗平反貴池殺人獄亦不自以為功也由是  
吏弗忍欺而民思之部使者考其績交章以聞事格不  
下代弘道為鄞貴池者皆弘道初持江浙文衡時進士  
人尤以為盛事云弘道世越人高祖澤宋孝宗龍飛進

士由侍御史諫議大夫至兵部尚書後以寶謨閣直學  
士食祠祿其行事見高公似孫所為碑文曾祖璧通直  
郎簽書武安軍節度判官廳公事祖厚之承直郎溫州  
樂清縣尉父續古將仕郎入國朝以弘道官七品贈從  
仕郎處州路慶元縣尹母趙氏知西外宗正事少師不  
遠之曾孫女妻胡氏太府卿直敷文閣太初之孫女今  
以贈若封並為宜人子男一人正蒙也當以廢得官未  
調予聞弘道垂屬纊猶力疾坐語精爽殊不亂其所存

必有過人者然則予之知弘道抑末矣銘曰

樹之既同有獲而弗充不贏于躬獨以嗇終後其豐

黃彥實墓誌銘

彥實諱叔英明慈溪黃氏年五十有五以泰定四年九  
月某日卒于鄞明年九月庚申葬餘姚之竹山潛異時  
與彥實游彥實言今天下文章鉅工知我者惟伯長伯  
長必先我死我死子其銘我伯長故翰林侍講學士袁  
文清公也滑藐焉晚出於文清無能為役彥實乃欲以

之承其乏耶而孰知滑之哭文清僅踰月又哭彥實邪  
滑雖不敏彥實之言詎可忘耶初朝廷既新貢舉法而  
場屋事久廢老生宿學多已物故後進之士無所依承  
則相率之彥實受弟子業凡彥實所指授取科名預薦  
書相望否者亦且去而補儒學官人皆為彥實喜而彥  
實顧不能少自貶以就有司之繩尺訖無所遇合以死  
人又莫不深悲之其知彥實者若是而已至於彥實之  
所存知之者未必盡也彥實之先大夫文潔先生宋實

祐丙辰文天祥榜進士負材能尚氣節而甚邃於經術所著書世多有之蓋先生之學壹以躬行為本故在朝著見謂忠鯁而分符握節所至舉其職業風采凜然先生三子俱克紹其家學而彥實最少介然特立不務為苟同尤酷肖焉文清稱彥實少游故都見世所稱知名人率賄常自保祕惋恨無可與語酒酣氣雄謂海宇方宴安休明宜取天下事置念慮以入計畫否則搜抉險幽浩然為萬里游遇不遇命也未幾泝來石上漢江西

游荆襄歷觀用武關要荒榛廢壘猶有能言昔時得失  
益慷慨自振而所見公卿大夫與布衣之士則皆與昔  
交游者無大異於是治其居曰憇菴閉門讀書益不妄  
交嗟乎彥實之於天下獨以文清為知已而文清之言  
如此彥實所存固可槩見也彼以是瑣瑣者為彥實置  
欣戚焉何哉彥實嘗為晉陵宣城蕪湖三學教諭又為  
和靖采石兩院山長間以茂異遣詣中書弗果行彥實  
殊不以小試為憲亦不以不大用為訛也彥實於經史百

氏之書過目輒成誦為文雋拔偉麗意氣奔放若不可  
禦而要其歸能弗畔於道有憇菴暇筆三卷詩文雜著  
總二十卷藏于家彦實之曾祖父曰世堯祖父曰奉議  
郎一鶻父曰朝奉大夫宗正少卿震文潔蓋門人私謚  
二母趙氏封安人而彦實沈出也娶岑氏先卒再娶王  
氏子男一曰祖德女二長嫁岑可久而夭次未行銘曰  
物之不齊雜糅錯出惡妍喜媸千古一律德人天游不  
物於物尚無有已孰為得失是惟浩然之死不沒磊落

軒昂崢嶸突兀發其遺編猶見鬚髯寫以石章用告幽  
室

青陽縣尹徐君墓誌銘

君諱泰亨字和甫姓徐氏其先衢州龍游之徐系出偃  
王而代祀遼邈莫詳其世次君曾大父曰誼甫有隱德  
大父曰克威以疾廢里豪乘間兼并其家生事日削父  
曰進始成童能隱忍激勵卒自奮以致完厚然喜施予  
又樂道人善以長者稱初娶越邵氏因徙家蕭山之漁

浦尋又徙餘杭而占籍焉繼娶陸氏俱無子其子男二人女一人皆李氏出君最長德祐元年從父避兵踰濤江夜夢神人告曰趣返否且及難既寤遂西還已而兵從東方來人皆曰天既俾徐氏有後又謹護之積善之報將在是乎君性篤厚而遇事警敏少嗜學能為詞賦既又從師受經用舉者試吏平江精思竭力雖憊不休人或譏其過君曰事無小不可忽也軍校有不法事在郡府君視其牘議不少貸漕運官屬恃其品級已高尤

恣橫凡姦私殺虐執事者率畏憚不敢竟其獄君一一  
具上論如律民間以匿朱張財物多無辜坐逮者君力  
為辨析免男女為奴婢者若干人憲府以時所引用斷  
例不一求文學吏整比之君定自中統訖大德為之綱  
目條分理貫簡而易求約而可守覽者便之既書滿行  
中書省署君歸安縣典史白雲宗僧沈某冒名爵凌官  
府有悟其意者兩人將宣之死地兩人之怨家私鄰女  
不得殺以滅口棄尸桑林中事覺陰使以他辭引兩人

傳致其罪君將直其寃吏持不可曰此沈公意孰敢拒也君盡立羣吏于前語之曰吾能死不能濫殺以求媚於人會使者行部君卒白出之沈之徒有僧某者通民家婦為其夫所毆而銜之適有遭劫殺者賊弗得僧為飛書誣其夫及有他怨隙者七人故以書墮遷卒家七人中或以罪黥卒得之曰此警跡也因捕治不疑君察其寃而七人者苦卒虐莫敢易辭君命去其杻械始垂泣自言令以左驗已具難之君服弊衣佯為賣卜至其

處悉得七人以已物實贓狀取其家餘絲布數升析縷以比無不合釜竈及他物存者又合僧乃伏罪七人者得直已而獲真賊於武康人始歎服焉縣獄舊有以男醉死弟自經死誣平人者獄已成君親為訪求其實悉生之鄰縣安吉有逐其妻之子而夜死於盜者意其子也巡官捕繫而煅煉成獄且取它衣物為證君為縱跡其事或驚懼以寔自首乃出其子而坐巡卒及行貨者屬歲大祲君夙夜施其拯救之術凡所給寧過厚曰無

以法害吾仁也已代去省臺猶以荒政委之陞平陽州  
提控案牘以內憂去服除遷海道都漕運萬戶府提控  
案牘方次里居而經理法行君以書論田不實役不均  
之弊累數千言宰臣領其要者得書大喜俾乘傳白於  
行省時列郡守咸以田事期集爭欲得君以佐其事君  
佐常州又佐池州所行一如其言他郡咸取法焉未幾  
以漕事至京師中書奏君以九品官仍為本府提控案  
牘兼照磨承發架閣漕法利病下至占候探測著海運

紀原七卷後有掠其美以自名者非本書也尋復以漕事至京師詣都堂獻書數萬言條陳漕運之弊當更張者十事執政得書移行省用其七至今賴之久之以職官入福建帥幕由令史為提控采列郡圖籍撰福建總目若干卷用例授將仕佐郎建德路總管府知事言當世空急行者其要六府上其事轉達於中書雖不報而隱然用其說人或指曰是徐某所嘗言者時朝廷方選用重臣宣撫兩浙江東君撫時政闕失關大體者為九

策以獻會其使遷他官不果行用覃恩授承事郎池州  
路青陽縣尹為治務教養其民縣人方某為割地以廣  
學宮章某為捐地以建惠民局有司歲徵民輸荒田租  
為田千四百頃人甚苦之君寘為之限募民墾闢教以  
修方置閘而覈見田歸其實行視它民田之阻山瀕江  
者俾因地勢為蓄泄以備旱潦歲饑則出己俸倡衆以  
賑之民有告四十人同發其廩粟者吏欲準強盜論君  
曰吾方憂其死而食之彼乃以求生而抵重禁當用法

外意可也悉答而遣之旁郡邑事類此有瘐死者憲府  
聞君議召其長吏切責焉鄰縣銅陵人爭魚池三十年  
君數語而決尤以是受知於上官滿代而歸留居吳之  
閭門無復仕進意結廬植花竹日與賓客觴酒賦詩或  
乘興獨往徜徉山水間自號可可道人元祐元年六月  
忽構疾諸子懼或請禱君止之曰吾猶未也果有異則  
止藥弗服時是矣已而有瘳久之乃以玷命止藥作遺  
書及戒其子佛事不必作親舊致賄不可受須臾端坐

言曰年六十五不為天官正七品不為小得正而斃焉  
幸矣言訖而逝十月六日也享年六十有五娶謝氏先  
二十九年卒繼潘氏子男五人曰震餘杭縣學教諭曰  
恒出後德清鍾氏曰濟曰孚曰良紹興和靖書院山長  
女一人適章光祖孫男五人思誠思恭思溫思義思文  
女五人俱未行震等遵治命以其年十一月某日歸葬  
錢唐石屋鄉先墓之後初君未及仕而父沒哀慟至頓  
絕母氏卒于官第晉亨以憂病惑君曲盡調護之力焉

君讀書務以致用不屑屑於章句作詩善體物寫情凡所著有端本書忠報錄自警錄可可抄書各一卷歷仕集二卷效方三卷及家譜詩集並藏於家吏學大綱折獄比事各十卷行於世而所謂海運紀原福建總錄皆列于官書予方樂聞君行事而良以狀來謁銘敢不諾銘曰

儒者之效久矣弗白矯矯徐君秉茲諒直施于有政藹焉厥績胡不卒施而有遺策勒銘告哀用表玄宅

松江嘉定等處海運千戶楊君墓誌銘

楊氏之先世有顯人宋之盛時有自閩而越自越而吳居澉浦者累世以材武取貴仕入國朝仕益顯最號鉅族今以占籍為嘉興人君諱樞字伯機贈中憲大夫松江府知府上騎都尉追封弘農郡伯春之曾孫福建道安撫使贈懷遠大將軍池州路總管輕車都尉追封弘農郡侯發之孫嘉議大夫杭州路總管致仕梓之第二子母陸氏所生母徐氏陸以封徐以贈並為弘農郡夫

人徐夫人溫之宦家女生君甫數歲而歿陸夫人撫君  
不啻如已出君警敏長而喜學一不以他嗜好接于心  
自刮摩豪習謹厚自將未嘗有綺紈子弟態其處家雖  
米鹽細務皆有法傑隸輩無敢以其年少而易之諸公  
貴人多稱其能大德五年君年甫十九致用院俾以官  
本船浮海至西洋遇親王合贊所遣使臣那懷等如京  
師遂載之以來那懷等朝貢事畢請仍以君護送西還  
丞相哈喇哈遜達爾罕如其請奏授君忠顯校尉海運

副千戶佩金符與俱行以八年發京師十一年乃至其登陸處曰忽魯模思云是役也君往來長風巨浪中歷五星霜凡舟楫糗糧物器之須一出於君不以煩有司既又用私錢市其土物白馬黑犬琥珀蒲萄酒蕃鹽之屬以進平章政事察納等引見宸慶殿而退方議旌擢以酬其勞而君以前在海上感瘴毒疾作而歸至大二年也閱七寒暑疾乃間尋丁陸夫人憂家食者二十載益練達於世故絕圭角破崖岸因自號默默道人泰定

四年始用薦者起家為昭信校尉常熟江陰等處海運  
副千戶居官以廉介稱被省檄給慶紹溫台漕輓之直  
力剗宿蠹培勑之弊絕無所容天歷二年部運抵直沽  
倉適疾復作在告滿百日歸就醫于杭之私廨疾愈劇  
不可為俄陞松江嘉定等處海運千戶命下君已卒至  
順二年八月十四日其卒之日也享年四十有九娶劉  
氏南渡名將太師鄆王光世之裔前四年卒贈嘉興縣  
君初君有三子俱未齎而夭奉父命以弟之子元德為

之子後乃有子曰元誠君卒時元誠生二年矣元德卜  
以元統二年正月某日襄祔事于泊櫓山先塋東百步  
與嘉興縣君兆合君從父兄朝列大夫同知集慶路總  
管府事清孫寶誌其墳而墓道之石未有所刻元德以  
狀來謁銘乃序而銘之序所不能悉者誌文可互見也  
君平生所賦詩有遺藁藏于家銘曰

弗私于佚維時之逢弗疚于用維才之通有伉其門堂  
構則崇其播其穫乃嗇不豐尚其嗣人勿替益隆琢石

以俟表茲幽宮

茶陵州判官許君墓誌銘

茶陵州判官許君既卒其友危君素曾君堅奉書若狀來徵銘以葬嗚呼潛於君同年生也安敢以不敏辭君諱晉孫字伯昭其先汲人宋南渡後徙建昌曾祖通某州團練使祖開進義校尉父炎仕國朝為薦林州儒學教授母車氏君弱冠游京師或介以謁趙文敏公又因文敏徧游大人先生之門以薦者被旨補國子學生一

時名師儒皆大奇之博士姚公尤器重焉會有詔設科取士君首以諸生擢延祐二年進士第上方好儒進士當得官者悉命卑便近地以寵榮其初遇君用是得建昌之南城縣丞天燈寺僧甲與乙有私怨欲殺之既操刀入其室值乙將爨捧所炊米而出驚仆于地奴走救得脫甲即以刀自刺連呼殺人且訴于縣獄已具君閱其牘曰捧米復能手殺人耶卒直之太平山中有竊浮圖氏因果之名以為教者文衣高座日臨其徒泉南廣

東慕而趨之金帛填委所聚男女恒數百千人不法之  
狀暴聞于官而吏置弗問君謂是將詐誤吾民為大姦  
亟列上于郡杖其首百其風遂衰凡君之處事精敏而  
剛果多此類藍田鄉民訟爭屋新城縣民訟爭山皆久  
不決郡併以新城事諉君聞君決事平或以屋歸其主  
或以山交相讓其能使民化服又如此郡守初怒君不  
阿數摧沮之君奉所受命書詣府曰上下相承以禮而  
已某不善事上官則有罪乞免去府僚既諭止君守亦

愧悔而加禮焉尋以南城例不得置丞改贑州錄事其治如在南城時包銀令下君鈎校物力之薄厚以應令民用不擾紋錦局吏竄毀匠籍而牽聯追呼濫及民伍君白于郡發架閣舊籍證之其弊以絕豪民憚君之政不便於已詣部使者誣以他事郡長貳素知君率其屬以去就明之部使者大驚訊之果誣也秩滿調湖州路長興州判官未上丁車夫人憂居喪壹用古禮服除殊無仕進意有司以聞乃以茶陵州判官起居於家行及

境病渴歸居久之復以病疫而卒至順三年三月六日  
也得年四十有五階止承事郎葬以某年某月某日墓  
在南城某鄉某原君性介特而羣居跋跋卑讓待儕輩  
如父兄與人言不苟為容悅然亦不以許為直其在南  
城官廨去家近日步出視事後雖居它官因不畜馬市  
薪菜自烹餚而食畧無難色權貴人有遺以美衣數襲  
者受而弗服也君筮仕後始學于內翰臨川吳公每以  
及門晚為憾其為文無曼辭詭辨而多骨鯁之言詩尚

蘊藉未病前一月夢為詩云至道難聞歲年晚聖賢不作後世亂詰旦語人曰吾詩辭意甚悲殆不類平生作及曾君求遺藁其家所夢詩在焉嗚呼其可哀也已君妻南豐趙氏有子一人曰章初君之季弟鼎孫卒後一歲趙夫人卒又一歲君遂卒甫四日仲弟益孫亦卒不兩月薦林府君卒今存者惟一子嗚呼是又可哀也

夫銘曰

將聖之門政學殊科兼取其長君材則多殃慶非類報

施何以未定者天君尚有子

江浙儒學副提舉致仕龔先生墓誌銘

先生諱璫字子敬姓龔氏宋鄉貢進士贈太中大夫諱炳之曾孫祕閣脩撰太常少卿贈通議大夫諱基先之孫中奉大夫直寶謨閣司農卿諱渠之子曾祖妣周氏祖妣葛氏並贈碩人妣周氏贈宜人初太中府君以避兵自高郵徙鎮江卒葬城西五州山子孫因占籍為鎮江人迨先生以宦游久留平江又家焉先生少聰敏稍

長能屬文德祐內附士大夫居班行者例遣北上司農  
府君以列卿在遣中行至莘縣不食而卒先生悲不自  
勝暨成人呼其弟理語之曰國亡家破吾兄弟又少孤  
不能以力振起門戶獨不可學為儒無辱先訓乎由是  
共刻意於學日以微辭奧義自相叩擊其文字交視莫  
公嵩俞公德鄰為丈人行而與戴公表元仇公遠胡公  
長孺盛公彪為忘年友聲譽籍甚人稱其兄弟曰楚兩  
冀以比漢之兩冀云東平徐公持浙右憲節聞其名辟

寘幕下尋舉教官歷平江之和靜學道兩書院山長以  
累考合格當赴吏部銓大名高公時叅預外省先生以  
書論役法之弊公得書喜曰子有用之材持文書來我  
為子取教授先生謝曰執政大臣以進賢退不肖為職  
天下士如某者能一力致哉誠推是心寒畯之幸公  
聞其言愈敬異之御史周公馳僉廉訪司事鄭公雲翼  
交薦先生宜在館閣皆不報用例調寧國路儒學教授  
秩滿遷主信之上饒簿以所生母蔣氏憂不赴服除授

袁之宜春丞其階再轉俱將仕郎先生笑曰五十年猶故吾耶蓋先生異時以門蔭補官亦將仕郎也在官歲餘移疾上休致之請遂以從仕郎江浙等處儒學副提舉致仕命下先生已卒于宜春其卒以至順二年十一月十七日享年六十有六臨終猶強飯正襟危坐命筆作三皇廟記俄投筆謂家人曰汝輩且去吾將少休頃之氣息奄奄而逝先生家事素薄客至不問有無倒壺命飲與之談前代故實娓娓不倦至為先生論說豪分

縷析必使厭所欲乃已兩持鄉闈文衡號明有司門生  
弟子彬彬以材自見稱之者不以官而曰先生云其在  
和靜復侵田若干畝在寧國徵逋租為錢十二萬五千  
緝刻春秋大學等十九書以惠學者而宜春之政役均  
訟平部使者以為能數諉以事顧以蒞治之日淺其所  
蘊畜有未悉展也娶周氏知江州德化縣方叔之女子  
男一曰魯女二適陳方夏景行孫男二曰宣曰宜女二  
俱幼魯以其年十二月返柩于鎮江明年五月十六日

葬五州山先墓東南若干步奉先生子婿陳方狀來謁  
銘狀稱先生材識足以超軼古人而忠厚不自己之情  
未忍斬然遽變其先世承傳之舊故其為言卓偉殊絕  
自成一家然亦未始不從容乎規矩繩墨中晚年學益  
醇鋒鍔都盡其進修之實或未易淺言也嗚呼苟非方  
從先生之久且孰能知之若是歟先生所著詩文魯  
既彙次成若干卷因先生自名其齋者目之曰存悔齋

墓云銘曰

龔初來南以士升太常司農遂世卿今孰嗣者宜春丞  
既仕弗進用文鳴立言成家樹風聲擺落凡近趨高明  
有來侁侁揚其英一鑑亡矣疇依承陳辭相哀垂百齡  
刻諸方珉告玄扃

奉訓大夫武昌路諸色人匠提舉漆君墓誌銘  
君姓漆氏諱榮祖字仲華古有漆氏而孔子弟子漆雕  
開之後亦或為漆君蓋其裔也曾大父世昌居江之瑞  
昌大父文興徙興國之永興又徙太平之當塗而占籍

黃池父永成宋將仕郎君仕皇朝歷黃池建康杭州三  
織染局副使稍遷武昌路諸色人匠提舉初階進義副  
尉用先賢子孫改將仕佐郎累陞奉訓大夫年踰六袞  
輒致仕而去君少敏於學敦行孝悌將仕君歿負土成  
墳松栢皆手植與兄弟分財均兄及弟前卒經紀其家  
事無遺力若未始異居者尤喜周人之急歲饑則為發  
粟病則與藥死則與棺里有叢冢積久而暴露為聚而  
化之如浮屠法鄉鄰多賴焉居官所至克脩其職業執

藝事者咸精其能其在建康以貢輸詣京師者皆再蒙  
恩錫賚甚厚以為榮惜其所處非要地品級已優而績  
用未顯也異時將仕君遊青山之保和菴以為茲謝公  
玄暉舊宅不宜使久廢不治買田二十畝界其徒至君  
又益以田四十有五畝而祠將仕君於廡下里人羅君  
記之將仕君封樹在新埂去家僅一里所君謀於兄弟  
割田若干畝以給歲時汎掃之須前進士汪君記之瑞  
蓮生墓前方池中前進士夏君記之興國先隴鄰於雙

泉寺君捐錢千二百五十緡為興茶利其徒創置祠宇  
守視墓域惟謹故集賢直學士貢公記之君嘗延羽流  
為將仕君歲醮事感八鶴來下述黃籙儀因著其靈應  
之實今天師張公玄教大宗師吳公序之故翰林學士  
承旨姚文公之使江東也愛君沈靜寡言進退閑雅為  
製其號曰可心其為一時鉅公引重如此君之才雖不  
大見於世觀其所與而其人可知也同里廣教寺法堂  
久未建君歸自武昌慨然以營造為已任閱兩寒暑而

堂成用錢以緝計者若干一出於已仍施田百畝以資  
他日繕葺之費住持僧德遠以瞿曇氏示現之日為登  
堂說法緝白四衆咸會君忽顧謂其子興宗曰吾事已  
畢將行矣明日竟以疾不起聞者嘆異焉君生於前至  
元辛未二月十一日卒於後至元丙子四月九日得年  
六十有六明年丁丑八月十日葬新埂將仕君墓之左  
娶史氏次索氏子男一興宗也蔭授寧國路織染局使  
女一嫁故相吳許公之玄孫錯孫男一女六其葬也興

宗不遠四千里俾以狀來乞銘迺按狀所載序而銘之  
銘曰

緊君之先惟漆雕氏受業聖門而不苟仕君於所祖匪  
襲其迹仕不擇祿由由自得孰遄其歸年未及謝展也  
達生委順而化仕而能止沒宜有後刻辭石章式示永  
久

文獻集卷八上

謹案卷八上四十二頁後五行察納舊作察那今

改後倣此



總校官庶吉士臣張能照  
校對官中書臣范鑿  
謄錄監生臣鄒世俊